



憲章類編卷之二十二

郡學文廟木主

天順六年三月蘇州府知府林鶚時蘇學廟像歲久多
剝落者或欲因其舊而加以脩飭鶚曰塑像非古我
太祖於大學易以木主百年夷俗乃革彼未壞者猶當毀之
幸遇其可易以木主有何不可或以毀聖賢像為疑鶚
曰此土泥耳豈聖賢耶孔子生於佛教未入中國之前
烏識所謂泥像哉於是併易從祀諸賢皆為木主

勅額書院

成化十五年十二月兵部右侍郎李敏奏臣往年為浙江按察使守制還河南襄城縣營市地于縣南紫雲山之麓凡三十畝有奇建屋若干楹積書數千卷日與學者講讀其中其地之所入亦足以供教學者之用願籍之于官以為社學因請勅額併令有司歲時脩葺從之賜額為紫雲書院

提學憲臣

正統元年五月始設提學憲臣南北直隸御史各一員各省按察副使或僉事各一員專勅責成不許巡按御史侵越以御史薛瑄為山東提學僉事

正統二年五月大學士楊士奇薦御史彭勗提督南畿學校師道卓立寬嚴得中一時東南士風翕然大振起勗江西永豐人永樂乙未進士

正統五年十二月以孫鼎為南直隸提學御史鼎初為

松江府學教授以清慎持已以禮讓化人士民咸信服之有司尊禮踰於上官嘗奉哀詔入臨府中誤翻戴喪冠知府見之亦遂翻其冠鼎前謁曰公冠翻非禮知府曰吾效先生其見敬信如此至是秩滿選陞提學中外皆稱得師

景泰元年十二月革提學憲臣

天順六年二月復詔提學憲臣以黃潤玉爲廣西提學僉事時以學政衰弛命廷臣舉有學行者督之楊士奇以潤玉薦遂命之

成化三年三月罷兩廣提學僉事時兩廣兵火之餘人物凋敝按察使夏瑱請暫裁革提學官而以他官兼之上可其奏

十二月以御史陳選提督南畿學校選先巡按江西肅察貞度至是以身爲教力變浮華徧歷郡縣以示範模諸生翕然感化時都御史韓雍居喪吳中猶務崇飾聞選入境戒其下曰陳御史至矣悉屏儀衛去之

成化六年十二月調江西按察僉事張悅于浙江提調學校

成化七年九月陞御史陳選爲河南按察司副使提調學校

成化八年六月擢掌京衛武學事國子監丞閻禹錫爲御史提調北直隸學校

成化九年二月以御史戴珊提督京畿學校凡考校必以文藝至古器識品藻精明諸生帖服

成化十三年正月河南按察司提學副使陳選陞本司按察使

成化十四年九月以戴珊爲陝西提學副使珊躬教諸生窮鄉下邑無不至約束堅明風雨不爽一如在南畿時云

十月命御史婁謙提督南畿學校

成化十九年七月命御史司馬堃提督南畿學校

成化二十年正月陝西提學副使戴珊爲浙江按察使弘治九年十二月以王鴻儒爲山西提學僉事

弘治十四年七月廣東提學僉事宋端儀卒端儀莆田人雅志理學嘗編考亭淵源初稿未就而卒以戶部郎中邵寶爲江西提學副使寶以身爲教先行檢而後

詞藝士類淳興脩濂溪書院檄取其族孫守之改建白鹿洞書院清學田定課程遠近向慕

正德三年八月南畿提學御史陳琳以劉瑾陰排大臣顯挫臺諫上言老成不可不惜狂直不可不宥言甚切至疏入忤旨謫廣東揭陽縣丞

正德四年三月 以席書為貴州提學副使

正德五年正月起李夢陽為江西提學副使

正德十四年二月以劉瑞為浙江提學副使

正德十六年五月世宗 起前東昌府同知何瑋為山

西提學副使瑋以居憂不赴任

按古養士於庠序今養士於吏部之考課觀察之激揚此義外之所由熾今之學校科目乃開收士之門國初菁莪之化專在學司及提調官至宣德間按察設提學特以稽實覈奸凡專則近而能悉簡而有功今一省教化之機悉攬於一人故浮泛而無功學司提調有辭以曠其職歆如古有造是以難得霍韜曰令出而人從之速者莫若督學憲臣故督學者好諂諛則一省皆佞舌也好文藻則一省皆縞辭也好實學則人將反躬也好

實行則人將易轍也何也朝廷使之懸其的以示人人之必有不歸徃乎

科目制

洪武丁未吳元年定文武科取士之法

洪武三年五月詔設科取士條格詔曰朕聞成周之制取才於貢士故賢者在職漢唐及宋科舉取士各有定制然但貴詞章而不求德藝之實前元依古設科待士而權家勢要結納奔競輒竊仕祿賢者耻與並進其隱

山林風俗之弊一至於此今朕統一華夷願得賢人君子用之自今年八月爲始特設科舉以取懷才抱道之士務在經明行脩博通古今名實相稱其中選者朕將親策于廷第其高下待以顯擢敢有奔競夤緣之徒坐以重罪五經義限五百字以上四書義限三百字以上論亦如之策惟務直述不尚文藻限一千字以上其高麗安南占城等國如有經明行脩之士各就本國鄉試許貢赴京師會試不拘額數選取遣使頒詔知之

洪武六年二月甲午罷科舉諭中書省臣曰朕設科舉

憲章類編 卷二十二
六
以求賢務得經明行脩文質相稱之士以資任用今有
司所取多後生少年觀其文詞亦若可用及試用之不
能措諸行事朕以實心求賢而天下以虛文應朕非朕
責實求賢之意也今各處科舉宜暫停罷別令有司察
舉賢才必以德行為本文藝次之庶幾天下學者知所
嚮方士習歸於務本 按是年罷科舉專用辟薦其目
有明經行脩有懷才抱德有賢良方正有人材有孝廉
群舉于朝而各省貢士皆令卒業太學以次除用蓋罷
進士之科者十有二年時既不喜文士又以初立辟薦

法行之甚嚴每舉者至京 上親校閱不稱旨輒坐舉

主往往有謫戍者至洪武十七年復開科今魁星圖下
列諸狀元姓名有洪武九年狀元張顯宗謬矣

洪武十五年八月 詔禮部設科舉取士令天下學校
三年一試著為定例

洪武十七年三月命禮部頒行科舉成式凡三年大比
子午卯酉年鄉試辰戌丑未年會試舉人不拘額數從
實充貢

成化十三年十二月 詹事府少詹事黎淳奏科場出

題作文定式謂洪武年間已常頒降近年所刊程文純粹者少駁雜者多乞移文所司將考試官究治申明科場舊制頒降學校永為遵守 上曰科舉重事各處出題刊文等事何為違式差謬該部會同翰林院學士等官覆奏考試等官務取學行老成之士不許徇私濫舉出題校文并刊錄文字必須合式依經按傳文理純正不許監臨等官干預

按洪武開科詔五經皆主古註疏及易蕪程朱書蔡詩朱春秋左公羊穀梁程胡張禮記陳乃後盡棄註疏不采入故耳然古註疏終不可廢也

各省鄉試

洪武三年八月京師及各行省開科鄉試

洪武四年二月上謂中書省臣曰今天下已定致治之道在於任賢既設科取士令各行省連試三年庶賢才衆多而官足任使也自後則三年一舉著為定例

永樂元年二月禮部言科舉舊制應于午卯酉年鄉試

去年兵革倉卒有未及舉行者請以今年秋八月皆補
試制曰可

八月復開科鄉試

洪熙元年四月鄭府審理俞建輔言伏讀制勅有曰爲
國以得賢爲重事君以進賢爲忠臣竊以進賢之路莫
重於科舉近年賓興之士率記誦虛文爲出身之階其
實才十無二三蓋有未嘗究心修己治人之道一旦掛
名科目而使之臨政往往束手無爲職事廢隳民受其
殃自今各處鄉試乞令有司先行審訪務通今博古行

止端重者許令入試比試則務選其文辭典雅議論切
實者進之會試尤加慎選庶幾士務實學而國家有得
賢之益 上諭禮部曰所言當理其卽行之

宣德七年九月御史包德懷給事中虞祥等劾奏順天
府鄉試關防不嚴致有詐冒請治提調官府尹李庸監
試官御史梁廣成等罪 上命姑宥之已而顧侍臣曰
科舉求賢國家重事於此而不用心他事可知已御史
給事中所劾本不可宥但念斯事因庸覺察不然則奸
弊露矣

正統九年令在京各衙門吏典承差人等聽本衙門保勘禮部嚴考通經無犯者送試仍行原籍勘實

景泰元年令各衛官舍軍餘曾送入學者許入試

景泰元年八月翰林侍講學士劉鉉主考順天府鄉試

及揭曉第一人劉宣乃盧龍軍士也同事者欲更之鉉

爭曰朝廷立賢無方不可乃止時論韙之

景泰四年正月增定各鄉試取士額數累朝以來漸增

應天府各一百名浙江福建皆六十名江西六十五名

河南廣東皆五十名湖廣五十五名山東四川皆四十

五名陝西山西皆四十名廣西三十名雲南二十名正

統三年及景泰元年開科皆不拘額數至是以天下人

才彌盛始加增定順天應天各增三十五名浙江江西

福建河南湖廣山東各增三十名廣東四川陝西山西

廣西各增二十五名雲南增十名

景泰七年八月洗馬柯潛奉命主考應天鄉試初入境

時泊舟淮安有應試生暮夜投潛潛叱之彼以重賂遺

前固請潛怒命左右執付有司以法懲之

天順二年令兩京天文生陰陽人及官生子弟許就在

京鄉試
成化九年正月北直隸提學閻禹錫奏順天應天兩府鄉試舊制以御史二人監試宜令預於十日前入院庶

詳察事端以祛積弊其同考試官宜令所司擇文學優長素行端介者毋徇勢要干請搜檢守號宜用在外都司官軍毋遣京營之人庶革其傳遞夾帶之弊至於校文須主考官詳慎將同考官落卷并二三場通行檢閱務得積學之士不許懶慢推託且兩京主考係侍從格心之臣若引嫌畏避卽內不足者隨當罷黜試錄就刻舉人文字不許主考代作以妨校閱詔從之

成化十年八月左庶子黎淳主考順天府鄉試初場得一優卷及觀後場絕不相類疑有弊勾稽墨卷果得謄錄生截卷狀移簾外按其事而取優卷為第一拆封乃馬中錫亦一時名士時學士謝一夔主考應天府鄉試得王鏊為第一試錄五策皆刻鏊場屋中墨卷不易一字一時稱得人明年鏊果會元及第

成化十五年十二月 御史許進言國家以科目取士慎選考官近各布政司每遇開科輒徇私情所聘考官者多非其人以致校閱不精兩京俱命翰林官主考故所取得人乞各布政司亦如兩京例命翰林官主考為是 上諭禮部臣曰科目選賢國家重事若聘主司有

狗私作弊者令巡按御史并布按二司互相糾舉或爾部中詳看體訪得出奏來必重治之 按嘉靖戊子辛卯各布政司鄉試俱命選京官二人主考亦與許進建言之意同恐此法終不可罷

成化二十三年二月禮部奉成化二十二年天下鄉試錄文多乖謬乞將考試官訓導黃奎等追奪聘禮令御史究問蓋教職多非有學識之士聘以典文罕稱其選云

弘治四年令醫士醫生在冊食糧執役者許在京應試
弘治十四年七月掌國子監禮部右侍郎謝鐸言四事
二曰重科貢以清入仕之路謂各省考官皆御史方面之所辟召職分既卑權衡無預以外籓之官而專去取關節相通人圖倖進必差京朝官二員以爲主考庶幾革弊而真才可得疏入下所司知之

中書舍人入鄉試

成化七年五月 中書舍人呂憲乞就順天府鄉試從之

欽賜舉人

景泰七年八月賜大臣子陳瑛王倫爲舉人舊制南北京鄉試令四方之士游太學及依親仕宦者皆得應試至是順天府鄉試命右春坊大學士劉儼侍講學士呂原爲考試官時內閣陳循子瑛王文子倫入試俱不中式循等論奏儼原二人閱卷不公許監試御史林鶚同邑林挺亦在中列且摘策題有無正統等語以泄帝怒請如洪武間罪劉三吾等例重開科考試上令翰林

院覆閱取中試卷高穀懼儼等禍且不測欲爲申救早朝奏事畢出班跪稱臣高穀有言因召至榻前具白其情且曰大臣子與寒士並進已不可况又不安於命欲構考官可乎由是儼等得釋而瑛倫特旨欽賜舉人許赴會試一時異之禮科給事中張寧劾奏循等私其子失大臣體不當居內閣乞罷黜不報

天順元年正月命景泰特賜舉人陳瑛王倫並除名

會試

洪武三十年二月禮部會試天下舉人學士劉三吾為
考試官取宋琮等三十八人北方之士並皆黜落

革除建文二年二月壬寅詔禮部尚書陳迪右侍郎黃
觀知貢舉翰林學士董倫太常少卿高遜志充考試官
右拾遺朱逢吉史官吳勤葉惠仲趙友士徐旭張秉彛
為同考試官御史王度俞吉士為監試官

永樂二年二月 禮部奏請會試選士之數 上問洪
武中所選幾何尚書李至剛對曰各科不同多者四百
七十餘人少者三十人 上曰朕卽位初取士姑率其

多後不為例

永樂十六年二月行在會試天下舉人

洪熙元年四月上諭禮部曰科舉之士須南北兼收南
人雖善文詞而北人厚重近累科所選北人僅得什一
非公天下之道自今科場取士南取六分北取四分爾
等其定議各布政司名數以聞

景泰五年二月會試天下舉人

天順元年二月會試天下貢士以內閣學士薛瑄侍講
學士呂原為考試官

天順四年二月會試天下舉人以學士呂原尚寶少卿
兼脩撰柯潛為考試官取陳選第一時舉人不中有怨
考官者以李賢弟李讓不中謂賢亦怒考官遂鼓其說
奏考官校文顛倒宜正其罪 上疑之召賢問曰此舉
人奏考官弊何以治之賢對曰此乃私忿考官無弊如
臣弟讓亦不中可見其公 上乃命禮部會翰林院考
此舉子荒踈且其人狂妄遂枷于部前群議方息

天順七年二月場屋災八月 禮部奏補會試命太常
少卿兼學士彭時侍讀學士錢溥為考試官時中式舉

人二百五十人

成化十一年二月命少詹事徐溥翰林侍讀學士彭華
為會試考官華以從子入場疏辭遂改命侍講學士丘
濬

成化十七年正月 禮部言二月會試天下舉人合用
考試官今詩易卷多冗每經各增一員 上曰科舉取
士務在得人增同考試官庶得詳於校閱從之

成化二十二年十一月 更定會試取士南北中卷額
數

弘治三年二月會試天下舉人命大學士徐溥少詹事汪諧為考試官

成化二十三年令舉人授教官六年有功蹟者許會試弘治六年二月會試天下舉人命太常少卿兼侍講學士李東陽少詹事兼侍講學士陸簡為考試官取汪俊等三百人

弘治九年二月會試天下舉人命詹事兼侍講學士謝遷侍讀學士王鏊為考試官取陳瀾等三百人

弘治十二年二月會試天下舉人命大學士李東陽掌詹事府禮部侍郎兼翰林學士程敏政為考試官三塲甫畢給事中華景昞上疏畧曰程敏政素因不謹已放歸田營求李廣復官禁近叨為考官甘心市井將論語表題策三問四問題賄賣與江陰徐經蘇州唐寅二生狂童孺子先以題問人且驕於衆已而果然敗露至此百口難掩臣思景泰年間徐泰買中順天解元事露覆試學士高穀曲護倖免今徐經與泰同家敏政又從而招徠之遂與唐寅等相率以賂其門朝廷取士之科關係最

大豈容再壞疏入下景獄候問禮部尚書徐瑄等覆議

奏敏政違避其私賣三場題目傳誦于外恐或未真况未開榜其所買之人曾否最中難以定奪合令李東陽會五經同考官將場中硃卷凡經敏政看者重加校閱果有情弊出場之後通行究治 是月二十九日揭曉取倫文叙等三百人凡敏政所取者李東陽等俱封收備照不錄工科給事中林廷玉復疏程敏政事謂臣嘗為同考試官與知簾內事且職在諫垣不可循默但據簾內所見敏政閱卷可疑六事上之於是逮廷玉敏政并下獄 夏四月會多官廷鞫華景林廷玉所劾程敏政

事間黜舉子唐寅徐經等十餘人為民令敏政致仕調景南京太僕寺典簿廷玉海州判官

弘治十五年二月會試天下舉人命吏部左侍郎兼學士吳寬侍讀學士劉機為考試官取魯鐸等三百人

正德三年二月會試天下舉人命少傅大學士王鏊掌詹事府吏部尚書兼學士梁儲為考試官取邵銳等三百五十人

正德六年二月會試天下舉人命大學士劉忠學士靳貴為考試官取鄒守益等三百五十人

正德九年二月會試天下舉人命大學士梁儲翰林學士毛澄為考試官取霍韜等四百人費宏以儲位在已上仍將會試錄旁注貼說指摘以進 上察知之置不問

正德十二年二月會試天下舉人命大學士靳貴少詹事顧清為考試官取倫以訓等三百五十人

正德十五年二月命吏部左侍郎兼學士石琚侍讀學士李廷相為會試考官取張治等二百五十人以上 南巡未廷試

按洪武辛亥有進士永樂癸未無進士天順癸未亦然永樂初卽位天順南省火皆以明年甲申會試永樂己丑 長陵北征又明年殿試故有辛卯進士正德庚辰康陵南巡明年 世宗卽位故有辛巳進士我朝百六十年癸未惟一舉 洪武四年會試錄題詞學士宋濂所撰不刻程文 會試考官洪武初以禮部尚書陶凱與前侍講學士潘廷堅為主司侍讀學士詹同國子監司業宋濂吏部員外郎原本前貢士鮑恂為同考至十七年始定制以待詔朱善典籍聶鉉為考試官而每科

額請翰林官二人主之若同考則正統前猶參用外官
教職景泰後始純用京職翰林之外有六科部屬行人
司弘治以來定翰林官九人與六科部屬共十四人正
德辛未以易詩書房卷多各增一員翰林十一人與科
部共十七人云會試去取在同考參定高下則主考柄
之至于取士多寡又俱臨期請自 上裁非若鄉試有
定數也

舉人會試年限

弘治四年九月大學士劉吉屢被彈章仍加官進秩市
人嘲之稱為劉綿花謂其愈彈愈起也或告吉以為出自
監中一老舉人好恢諧者吉因奏定舉人三次不中者
不許會試及致仕出城兒童走卒群指之曰綿花去矣
吉去舉人會試禁限亦除

場屋火

正統三年八年 翰林侍講學士曾鶴齡主考順天鄉
試初試之夕場屋火試卷有殘缺者有司懼罪不敢以

更試爲言惟欲請葺場屋以終後兩試鶴齡曰必更試
然後滌百弊以昭至公不然雖無所私此心亦欺朝廷
何惜一日之費不成此盛舉哉有司具二說以進命下
悉如鶴齡所言人皆懾服是科稱得士云

天順七年二月會試場屋災舉子被傷者數十人

乙榜舉人

洪武三十年二月令禮部乙榜舉子署教諭訓導年未
三十不願署教者聽 按永樂四年傳臚之明日進所

選副榜士臨策之擢周翰等十二人進學翰林餘俱付吏
部除學官宣德間副榜舉人得冠帶讀書太學蓋循此
制自是至正統後副榜始不復廷試矣

廷試

洪武四年三月 親策會試中式舉人於奉天殿賜吳
伯宗等一百二十人進士及第出身是科高麗金濤中
三甲授東昌安丘縣丞以不通華言請還本國詔給道
里費送歸

洪武十八年三月 上御奉天殿策試舉人賜丁顯等
四百七十二人進士是科練子寧對策極言今日朝廷
用人徇其名而不求其實以小善而遽進之以小過而
遽戮之因歷陳古人所以教養任用之道言甚剴切不
顧忌諱 上嘉之擢第二又得黃子澄 後靖難師起
以奸黨戮之仆碑削籍

洪武二十一年三月 上御奉天殿策試舉人賜任亨
泰等九十七人進士及第出身有差特命立石題名于
太學著爲令是科得卓敬齊泰

洪武二十四年三月 上御奉天殿策會試中式舉人
賜許觀等三十一人進士及第出身有差觀貴池人鄉
會試俱第一後復姓黃

洪武二十七年三月 上御奉天殿策會試中式舉人
一百人賜張信等進士及第出身有差

洪武三十年六月 上御奉天殿策試復取下第舉人
先是禮部會試中式者少而北士被黜落者感言取士
不公 上閱所取多南士亦疑之乃詔考官劉三吾及
陳郊等一甲三人皆下獄命翰林院儒臣重閱落卷得

文理優長者六十一人皆山東山西北平河南陝西四川之士至是復廷試之賜韓克忠等進士及第出身有差

革除建文二年三月策試禮部中式舉人 賜胡靖王艮李貫等一百一十人進士及第出身有差以靖等三人並授翰林脩撰廷試策艮最優以貌不揚易靖第一靖初名廣 上特為易名後復名廣與同榜楊榮金幼孜楊溥胡濙顧佐陳洽皆為永樂時名臣唯艮死建文之難故曰以貌取人失之子羽艮貫皆吉水人貫獨不

類君子班之

永樂二年三月 殿試禮部中式舉人賜曾棨等四百七十二人進士及第出身有差是科得陳敬宗周忱新進士李衡自言臣父洪武中得罪死於法臣不當違令干進 上曰古之聖人亦有罪其父而用其子者但為子能改父行致顯聞於世足以為賢若以父死非命終身不仕亦未必合中道爾能力學進用雖違令而志可嘉朕不爾罪而其勉之

永樂四年三月壬寅 上御奉天殿試禮部中式舉人

二百一十九人賜進士及第出身有差命國子監立石題名是科王驥以軍功著封伯贈侯

永樂九年三月 上御奉天殿試禮部永樂七年會試中式舉人陳璩等八十四人賜進士有差是科得錢習禮

永樂十年三月 上親策禮部中式舉人一百六人賜馬鐸等進士及第出身有差是科得羅通陳益

永樂十三年三月 上御奉天殿閱舉人對策賜進士三百五十一人是科得王翺高穀

永樂十六年三月 上御奉天殿策會試中式舉人賜李騏等二百五十人進士及第出身有差

永樂十九年三月 上御奉天殿試禮部中式舉人及前科未廷試舉人凡二百一人賜曾鶴齡等進士及第出身有差是科得薛瑄劉球于謙

永樂二十二年三月 上御奉天門策禮部中式舉人賜進士邢寬等一百五十人是科得軒輓耿九疇

宣德二年三月 上御奉天殿策試舉人 上既發策退御左順門謂翰林儒臣曰國家取士科目為先所貴

得真才以資任用古人取士於鄉其行藝素有一定論至
朝廷復辨其官才所以得人爲盛後世惟考其文學欲
盡得真才難矣然文章論議本乎學識有實學者其言
多剴切無實見者其言多浮靡唐虞取士亦嘗敷奏以
言况士習視朝廷所尚朝廷尚典實則士習日趨于厚
朝廷尚浮華則士習日趨于薄此在朝廷激勵成就之
有道也爾等其精擇之朕將親覽焉

上親閱舉人所對策賜進士馬愉等一百一人 按是
科始分南北中卷取士愉山東臨朐人楊士奇云宣德

以前皆南北士合試未有北士居首選者有之自馬愉
始

宣德五年三月 上御奉天門策會試中式舉人上臨
軒發策畢退御武英殿謂翰林儒臣曰朕於取士不尚
虛文欲得忠鯁之士爲用其間有若劉蕡蘇轍輩能直
言抗論庶幾所望朕當顯庸之於是賦策士歌以示諸
讀卷官云是科賜進士一百人得廖莊劉實

宣德八年三月 上御奉天殿策試禮部中式舉人賜
曹鼐等九十九人進士先是鼐舉鄉試授代州學正辭

為泰和典史至是及第第一

正統元年三月 廷策會試中式舉人周旋 等進士
一百人省元劉定之名在一甲第三是科又得李東崔
恭

正統四年三月 上親策會試中式舉人賜進士施槃
等一百人是科得章綸倪謙王竑

正統七年三月 上親策會試中式舉人一百五十人
賜進士劉儼等是科有所建立者呂原項忠程信韓雍
姚夔

正統十年三月 廷試舉人賜商輅周洪謨等進士一
百五十人得葉盛

正統十三年三月 殿試禮部中試舉人岳正等一百
五十人賜彭時等進士及第出身有差岳正一甲第三
又得王恕劉珣夏寅陳俊 彭時上表謝恩之夕坐以
俟旦隱几不寤竟失朝糾儀御史奏令錦衣衛拿禮書
胡濙出班奏狀元彭時不到合令錦衣衛拿 上是之
景泰二年三月 廷策舉人賜進士二百人是科鍾同
馬文升余子俊林鶚楊守陳秦紘高明後皆以功名顯

景泰五年三月 殿試賜進士三百四十九人得張寧
內丘濬何喬新楊瑄耿裕鄧廷瓚皆以功名顯

天順元年三月 殿試賜黎淳等進士二百九十四人
內楊繼宗彭韶後有令聞

天順四年三月 殿試賜進士一百五十人得陳選張
元禎張悅劉健周經黃孔昭

天順八年三月憲宗 上以在疚傳策廷試癸未秋禮
部補試中式舉人賜彭教等進士二百四十七人內劉
大夏張敷華戴珊樊瑩謝鐸李東陳陽倪岳後皆顯著

成化二年三月 上御奉天殿策試舉人章懋等三百
五十人賜羅倫及第第一時會元狀元咸稱得士內賀
欽莊杲韓文能繡許進林瀚後皆為名臣

成化五年三月巳亥 上御奉天殿策試禮部中式舉
人二百五十八人賜進士張昇等及第出身有差是科
雍泰李崙後皆有聞

成化八年三月 上親策會試中式舉人吳寬等二百
五十人仍賜吳寬進士第一先是寬屢試于鄉不利貢
入國學絕意仕進不復應舉提學御史陳選禮聘敦請

鄉試遂舉第三至是會試殿試皆魁天下不負科名是科又得陳壽孫需楊一清後皆有聞

成化十一年三月 上御奉天殿親策舉人王葵等二百九十七人親閱所對策賜謝遷等進士及第出身有差

成化十四年三月 上親策會試中式舉人梁儲等三百五十人賜進士及第出身有差時曾彥年六十餘執政以其對策簡約遂置第一是科得林俊劉忠彥

成化十七年三月 上親策會試中式舉人賜進士王華等二百九十八人

成化二十年三月 上親策會試中式舉人儲瓘等賜進士三百人內蔡清邵寶儲瓘王雲鳳俱有聞于世

成化二十三年三月 上御奉天殿策試舉人賜費宏等進士三百四十九人內吳廷舉傅珪王鴻儒鄒智楊廉石珪皆有聞于時

弘治三年三月 殿試賜進士三百人狀元錢福尋以不檢敗內方良永彭澤皆有聞于後

弘治六年三月 廷試賜毛澄徐穆羅欽順等進士及

第出身有差

弘治九年三月 廷試賜朱希周等二百九十八人進士內有陳茂烈

弘治十二年三月 殿試賜倫文叙等進士及第出身有差

弘治十五年三月 廷試賜康海等三百人進士

弘治十八年三月 廷試賜進士三百人

正德二年三月 廷試賜呂柟等進士及第出身有差

正德六年三月 廷試賜楊慎等進士及第出身有差

慎輔臣楊廷和子

正德九年三月 廷試禮部舉人賜進士及第出身有差

正德十二年三月 殿試賜舒芬等進士及第出身有差

正德十六年五月世宗 殿試庚辰年中式舉人禮部奏武宗喪禮事宜從簡 上御西角門發策問賜進士

三百三十人狀元率諸進士於西角門上表謝恩

按洪武四年廷試登科錄止刻制策一篇進士家狀

有籍貫無年歲或字或不字或書祖父名或不書

廷試讀卷官

成化十一年二月命少保吏部尚書兼文淵閣大學士彭時戶部尚書兼翰林院學士商輅禮部尚書兼翰林院學士萬安吏部尚書尹旻戶部尚書楊鼎兵部尚書項忠刑部尚書董方工部尚書王復太子少保兼都察院左都御史李賓王越通政使司工部尚書張文質大理寺卿宋旻翰院學士王獻侍讀學士彭華侍講學士

尹直為殿試讀卷官

成化十四年三月以大學士萬安劉珝劉吉吏書尹旻兵書余子俊刑書林聰工書王復兵書兼左都王越掌通政司事工書張文質大理寺卿宋旻充殿試讀卷官

按讀卷官

國初用祭酒修撰等官洪武初國子祭

酒魏觀太常博士孫吳與給事中李顏修撰王傑四人充讀卷正統中猶與其事其後非執政大臣不得與而去取之柄則在內閣國初于殿試之明日即傳臚揭榜今制約以三日內閱卷禮部地專而人衆庶

得盡心鑒別云 凡殿試讀卷官內閣於大學士學士等官內具名送該部奏請至日與各衙門該讀卷官詳定試卷次日同赴文華殿內閣官將第一甲三卷以次進讀俟 御筆批定出將二甲三甲姓名填寫黃榜又次日早同赴華蓋殿內閣官進至御座前以次折卷將姓名籍貫面奏司禮監官授制勅房官填榜畢開寫傳臚帖子內閣官一員捧榜出至奉天殿授禮部尚書制勅房官將帖子授鴻臚寺官傳臚其授卷彌封掌卷官從內閣於翰林院及春坊等官并制勅房官內推選與各衙門官相兼執事翰林院坊局始不過五人後增至七人遂為例 恩榮宴所洪武時無考永樂九年宴于會同館十三年宴于留守行後軍都督府立石宣德五年宴于行在中軍都督府宣德八年始賜宴于禮部遂為例

復試下第舉人

永樂二年六月 上命禮部曰會試下第舉人既多其中必尚有可取者或本有學問而為文之際記憶偏差

以致謬誤或本不謬誤而考閱之官神情昏倦失於詳審以致黜落此皆可矜其令翰林院出題更試擇文詞優等者以聞遂得貢士張鉉等六十人以奏 上召見皆賜冠帶命於國子監進學以俟後科且勉之曰士當立志志立則工專工專則業就爾等於學已有根本但更當進步爾後科第一甲者有不在爾曹乎其往勉之

永樂四年三月 上慮禮部下第舉人中或有遺才復親試之得文學優等二十一人各賜冠帶

永樂十三年三月 上以禮部會試下第舉人中或有學問可取者命翰林院再試之續取二十四人並賜冠帶給教諭俸送國子監進學以待後科

違限舉人

宣德七年三月 大通關提舉司吏文中自陳臣廣東瓊州府儋州昌化縣學生永樂二十一年鄉試中式因病未及會試繼丁母憂宣德六年八月至部以違限充吏切思海外之人本圖光顯今乃論謫為吏伏望聖恩矜念 上命禮部試驗其文可取命復舉人候下科會試

歲貢

洪武十六年二月命天下學校歲貢生員

洪武二十一年九月詔更定歲貢生員例府學歲一人州學二歲一人縣學三歲一人

成化四年五月禮科給事中成實言近禮部奏稱該年歲貢生員若已行起送遇有事故或過一年之上者不許補貢夫以堂堂國學雖納馬納粟者皆得肄業其中何獨於此數人不能容哉乞自今年不分年月又近准

令次貢考補庶使人材無所阻滯 上命所司從其言
成化十二年四月禮部言南方府州縣歲貢生員考中者例送南監景泰年間因北監充撥數少暫留今宜仍舊例從之

成化十七年十一月貴州程番府知府鄧廷瓚奏本府新立學校土人子弟在學者乞歲貢一人 上曰朕以蠻夷率化既建學置徒比之內地但科舉之業未可猝成宜歲貢生員一人俾觀光上國相勸於學以稱立賢無方之意

弘治十四年七月掌國子監禮部右侍郎謝鐸言四事
二曰歲貢一途雖亦得人但近來提學官類從姑息必
責其果通三場方許充貢疏入下所司知之

試歲貢生

永樂二十二年十月禮部引歲貢生奏送翰林院考試
仁宗召楊士奇等諭曰百姓不得蒙福者由守令匪人
守令匪人由學校失教歲貢中有不通故事不明道理
者此豈可授官自今嚴考試之法不在文詞之工拙但
取有理致者取之嚴則不學者不復萌僥倖之望而有
嚮進之志矣

選貢

天順五年十一月令天下生員年四十以上者考選送
國子監肄業先是宣德中令生員年四十五以上者考
選送監以後間一行之

弘治十七年三月南國子祭酒章懋疏奏古者大學所
養皆天下之俊秀故人材盛而風俗美我國家稽古制

治尤重太學以敦化原洪武永樂年間在太學生徒動數千計其人類多少俊而教育之法至爲周詳計日以通經積分以出仕布列庶位得人爲多爰及近年生徒漸少計今本監見在之數科貢兩行共止六百餘人其歲貢一行非無可與共學之資而衰遲不振者十常八九蓋由積累歲月挨次而升故也誨誘雖勤不無扞格其舉人一行節該南京禮部劄付開送新舊舉人共該六七百人又多不肯前來坐監罰雖嚴於違限彼亦視爲泛常夫歲貢之入監旣出挨次而舉人之坐監又每

後時故差撥常患於不敷而教養尤難於見效有養士之名而無得人之實此臣之所甚懼而夙夜不寧者也近年有增貢之舉而所拔亦挨次之人資格所拘英才多滯乞於常貢外令提學憲臣於人才素多去處行選貢之法不分廩膳增廣生員通行精加考選務求行著鄉閭學通經術年富力強累試優等者乃以充貢通計天下之廣約取五六百人照依地方分送兩監今年首行一次以後或三年或五年量在監人材多少間一行之如此則生徒之數可以漸及往年且多精銳可進之資

不貽因循自悞之悔臣雖不知所以爲教然亦安敢不
盡其心勤用提撕嚴加程督稍彷彿積分之意用申激勵
之方務令文行兼脩政教粗舉成材有望附選及時豈
惟差撥恒充固將官使克稱庶乎國家有以收養士之
效而臣亦少逭尸素之愆也命下所司議行

恩章類編卷之二十二終

